

Program Pupuk wadah interaksi siswa perubatan dan penduduk pedalaman

UB 20.12.2017 B3

PROGRAM Perkongsian Universiti-Keluarga (Pupuk) yang telah dimulakan Fakulti Perubatan dan Sains Kesihatan (FPSK) Universiti Malaysia Sabah sejak tahun 2006 terus menjadi wadah bagi pelajar perubatan UMS untuk berinteraksi dengan masyarakat di kawasan pedalaman Sabah.

Profesor Perubatan FPSK Prof. Dr. Zainal Ariffin Mustapa berkata program ini melibatkan jalinan berterusan antara universiti, Kementerian Kesihatan Malaysia, Kerajaan Negeri Sabah dan penduduk setempat dalam menjayakan program kesihatan masyarakat.

“Program ini merupakan satu aktiviti kurikulum untuk pelajar perubatan dan kejururawatan, yang antara lain turut bertujuan untuk menjalinkan hubungan silaturahim antara pihak universiti dengan masyarakat desa,” katanya.

Beliau berkata demikian dalam satu Majlis Penyerahan Keluarga Angkat Program PUPUK di Dewan Pusat Pendidikan dan Perubatan Desa (PPPD) Sikuati, Kudat yang dirasmikan oleh Pegawai Daerah Kudat, Sapdin Ibrahim baru-baru ini.

Menurut Prof. Zainal, program pada kali ini menyaksikan seramai 100 pelajar tahun satu FPSK

telah diagihkan kepada 30 keluarga di Kampung Pinawantai, Matunggong, Kudat.

Sementara itu, Sapdin dalam ucapannya merakamkan penghargaan terhadap pihak pengurusan UMS di atas pemilihan daerah Kudat untuk program Pupuk sejak program itu bermula lebih sedekad lalu.

“Saya percaya program ini telah memberikan impak yang positif kepada penduduk dari pelbagai kampung di sekitar Kudat sejak pelaksanaannya.

“Diharapkan agar program ini akan terus diadakan di daerah ini untuk kebaikan masyarakat di luar bandar khususnya di

daerah Kudat dan kawasan sekitarnya,” katanya.

Dalam pada itu, Ketua Kampung Pinawantai, Suntiam Mantagilir melahirkan rasa bersyukur dan bertuah kerana kampung beliau dipilih untuk pelaksanaan program Pupuk pada kali ini.

“Melalui program ini diharap dapat meningkatkan kesedaran terhadap kepentingan pengetahuan dan penjagaan kesihatan diri dan keluarga kepada penduduk kampung,” katanya.

Turut hadir pada majlis itu, Dekan FPSK Prof. Dr. Mohd. Saffree Jeffree dan penyelarar program Pupuk Prof. Madya Dr. Naing Oo Tha.



ZAINAL (lima dari kiri) bergambar bersama wakil pejabat daerah Kudat dan ketua kampung pada majlis penyerahan keluarga angkat.